



KERJA penambakan benteng dilakukan di lokasi tanah runtuh.



SEBAHAGIAN mangsa di pusat pemindahan sementara.



KAKITANGAN JKM membuka kaunter bantuan.

■ Besi cerucuk siap dipasang sepenuhnya, pemasangan bahan sokongan lain terus dilakukan

TANAH RUNTUH DI SERENDAH

Tanda positif pengukuhan struktur

Amrullah Abdul Karim
hmetroshahalam@-
hmetro.com.my

Serendah

Hari ketiga tragedi tanah runtuh di Jalan Utama, Taman Idaman, di sini, menunjukkan perkembangan positif apabila beberapa kawasan yang berisiko diperkuatkan dengan pemasangan besi cerucuk, batu dan pasir.



MOHD Fauzi (tengah) bersama Supramaniam (kanan) menjawab soalan media di sidang akhbar pegerakan operasi tanah runtuh di Taman Idaman, Serendah.

Pegawai Daerah dan Tanah Hulu Selangor, Mohd Fauzi Mohd Yatim berkata, besi cerucuk itu sudah disiapkan sepenuhnya dan pemasangan bahan sokongan lain akan terus dilakukan.

"Pemasangan bahan seperti pasir dan batu sudah dimulakan dan kerja pemasangan 'gabion' dilakukan di belakang besi terbabit.

"Pembetung berbentuk U juga dipasang di kawasan air bawah tanah," katanya pada sidang media, semalam.

Menurutnya, pemantauan cerun oleh pasukan teknikal dilaksanakan 24 jam sejak hari pertama kejadian itu.

Beliau berkata, Jabatan Pengairan dan Saliran (JPS) membuat pemetaan kawasan menggunakan dron untuk mengenal pasti sekiranya terdapat punca air yang mengalir di kawasan Taman Idaman.

"Kerja cerapan selesai jam 2.30 petang semalam (kelmarin) dan hasil pemetaan awal tidak menemui sebarang punca yang boleh menjadi punca aliran ke taman itu.

"Namun, hasil kajian awal Jabatan Mineral dan Geosains (JMG) mendapati kawasan kejadian adalah bekas lombong yang ditambak dan dibina rumah," katanya.

Sementara itu, Ketua Polis Daerah Hulu Selangor Superintendan R Supramaniam berkata, keadaan struktur tanah yang disahkan selamat tanpa pergerakan dan runtuhan baru membolehkan usaha membawa naik baki empat kenderaan dilakukan semalam.